



Fernand ETGEN
President vun der
Deputéiertechamber
19, um Krautmaart
L-1728 Lëtzebuerg

Lëtzebuerg, den 16/12/2020

Här President,

Sou wéi den Artikel 83 vun eisem Chambersreglement et virgesäit, bieden ech lech, dës parlamentaresch Fro un d'Ministere fir Kommunikatioun & Medien & Bildung weiderzeleeden.

Zur Zäit gëtt an der Chamber de Gesetzesprojet 7631 an der Chamber an diskutéiert, deen de Minister fir Kommunikatioun a Medien deposéiert huet. Mat dësem neie gesetzleche Kader sollen den Online-Journalismus mam Pabeier-Journalismus gläichgesat an d'Online-Printmedien an Zukunft verstärkt ënnerstëtzt ginn. Dëst liicht an, well déi 2017 kuerzfristeg agefouert Hëllef provisoresch geduecht a fir vill Journalisten an Editeure just eng Drëps um waarme Stee waren.

Wéi et dëst Joer annoncéiert gouf, wäert de Lëtzebuerger Journal vun 2021 un och de Wee vum Online-Journalismus goen, an zwar radikal: d'Printversioun soll nämlech komplett agestallt ginn. Wat d'Beispill vum Journal e bësse speziell mëscht, ass den Ëmstand, datt et sech hei ëm ee classesche Fall vu Parteipress ze dinn hun.

Esou ass gewosst, datt am Verwaltungsrot vun den « Editions Lëtzebuerger Journal » praktesch nëmme Membere vun der DP sëtzen. Dat selwecht gëllt fir den Haaptaktionär, d'Asbl « Centre d'Etudes Eugène Schaus », wou quasi sämtlech verantwortlech Positione mat DP-Membere besat sinn. Wann een d'Statute vun der Asbl liest, fënnt ee Folgendes : « L'association a pour objet la propagation des idées défendues par le Parti Démocratique, le tout tant isolément que dans le cadre de la ou des associations et sociétés commerciales dont elle est ou pourra devenir membre ou associé. » An de Parteistatute vun der DP steet schliesslech, wou d'Memberen sech informéiere sollen : « Les membres sont invités à s'informer au Lëtzebuerger Journal, organe officiel du parti, et à souscrire un abonnement ; l'accès à l'information leur sera également facilité par les médias électroniques. ».

Esouguer an der Schoul gëtt geléiert, datt de Lëtzebuerger Journal en « organe de presse partisane » ass. Esou steet et am Manuel scolaire « Instruction civique » vun der 2e geschriwwen:

« Le Journal est l'organe de presse officiel du parti démocratique ».



www.piraten.lu

De Risiko vu politeschem Afloss beim Journal ass also zweifellos ginn. Opgrond vun dësen Elementer kann een dovunner ausgoen, datt de Journal éischter eng Parteizeitung an eng Composante vun der DP ass wéi eng Zeitung, déi onofhängege Journalismus bedreift.

Wann een d'Montante vun der Pressehëllef kuckt, gesäit een, datt de Lëtzebuerger Journal 2019 974.448,74 Euro ausbezuelt kritt huet. Déi fënnef Joer virdrun huet déi liberal Zeitung all Joer an der Moyenne bal 950.000 Euro krut. Interessant ass och dee gewaltege Sprong tëschent 2012 an 2013, deem iwwregens soss keng Zeitung gemaach huet: vun 606.426 Euro op 893.603 Euro.

An deem Zesammenhang wéilt ech de Ministeren dës Froe stellen:

1. De Medieminister hat an der Äntwert op d'Question parlementaire 1531 vum honorabele Kolleg an Députéierten Sven Clement geäntwert :

« Déi Prinzipien vun der Indépendance a Pluralismus sinn zu Lëtzebuerg net a Gefor an d'Regierung ass décidéiert, déi Prinzipien och weider ze stäerken ».

Här Minister, wéi ass de Prinzip vun der Indépendance mam konkrete Fall vum Lëtzebuerger Journal ënnert een Hut ze kréien ?

2. Här Bildungsminister, wëssend, datt am Cours « Instruction civique » de Schülerinnen a Schüler bäibruucht gëtt, datt de Lëtzebuerger Journal dat « offiziellt Presseorgan vun der demokratescher Partei » ass an den Här Minister Meisch net midd gëtt ze betounen, datt d'Zeitung sech méi breet opstellt an onofhängeg ass, wäert dëse Passus an der nächster Editioun vum Schoulbuch gestrach ginn? Falls jo, wéini kënnen d'Schüler op der 2e vun engem neien, aktualiséierten Civiquesbuch profitéieren?
3. Ass d'Konzept vun esou enger « Parteipress » nach zäitgemäss, a wéi steet d'Regierung dozou ?
4. Misst de Lëtzeburger Journal net vill méi kloer affichéieren, datt et sech bei der Zeitung ëm ee Presseorgan handelt, dat an direkter Linn vun der Demokratescher Partei ofhänkt ?
5. Wéi soll de Lëtzebuerger Journal am Kader vum neie Pressehëllefgesetz ënnerstëtzt ginn, wëssend,
 - datt seng Papeiersédition agestallt gëtt,
 - datt an Zukunft, wat d'Hëllef ugeet, keen Ënnerscheid méi gemaach soll gin tëschend der « Presse écrite imprimée » an der « Presse en ligne » an,
 - datt eng Iwergangszäit vu fënnef Joer eventuell finanziell Engpäss kompenséiere soll?
6. Hunn DP-Memberen an der Regierung sech bei den Diskussiounen ronderëm den Avant-Projet de Loi am Regierungsrat enthalen, wëssend, dass hier Partei esou eng Parteizeitung huet?
7. Kann ausgeschloss ginn, dass am Regierungsrat eng op de Journal optimiséiert Pressehëllef ausgeschafft ginn ass?
8. Ass der Regierung bekannt, ob et weider esou Parteizeitungen hei am Land ginn?



Mat déiwem Respekt,

A handwritten signature in black ink, consisting of several fluid, overlapping strokes that form a stylized, somewhat abstract shape.

GOERGEN Marc
Député

